



# EIPONE BO ALI IPEDORIA ONI AITIDISIAR AMARIAO KA ENGUNGET LOKA ALUP KO TESO?



**Land and  
Equity Movement  
in Uganda (LEMU)**

*Making land work for us all*

Itunga luikidioko kes ejatatar ka abaluwan nuitodunitos ebe eraas alup nukec. Itunga luipu mam ebwaunitos alupokec (airanakin ingaroi toma). Kwape emameata aanyuneta nuka amor, nuecamunitos ikisila, emamei do amaapu naitodiarit ikoruno naejeni loeyait akiro nuka lup kakwapuwok. Eyangaunit do na eigur loka alup, elomununei eigur kotoma apak naegeuniata itunga epeget kanuka eikor loka alup.

Mam erai ebe ibusakinit jo airanakin amor toma alupokon, aitwasam ingarenok luka edistricta; mam erai ebe tetere ikorunokon luka alupok ecaete kotoma atutubetawok. Ejok itunga lueseunitai ayait akiro nuka alupok, aitegear ainapeta nu kotoma ocaalo.

## **Nunyoika ibusakinit oni aswam**

Nasodit, ekoto yes acamanar kotoma atutubetekus ebe, ekoto ikorunokus ocaete.

Kosodete acamanar oipone ali ipedoriata yesi aigiruna ikoruwon kus. Ido ekoto iboro luitwasamaete yesi kanuka aigirunia ikoruwon, koraasi lu mam elemaros. Tetere mam itunganan ice epedori aijulakin. Ekoto yes kere ocamunitos aitwasam kes; tetere nginitunganan kere ejeni ebe eraasi kesi luigirunitere ikoruwon. Ikitu luejokuka, ido luipedori oni aitwasam kes ijumulai arai amujaj. Ekoto da ojai aiwadikaet nainomakinitai amaapu arai aigireta nuka eikor loka alup, arai nginimisiri. Kosodete ainakin nginitunganan aiwadikaetengin. Arai emo eigur arai amamus acamanara alomun, epedori nginitunganan aitwasam akeiwadikaet, aitodunia nejaas ikoruno. Epedorio bobo aitwasam aiwadikaeta nu arai ejai itunganan agwelar arai aipagisaar alupoke; kanu aisipedor itunga kere ajenun ai ejaasi ikoruno luka alupok. Ipedorete bobo yesi acamanar nebeit amaring arai aridi aitorit toma, tetere mam eigur elomuni kiding naka itunga luejaas ka akituk ka luemameototor. Epedorio ainakin ljaka da aiwadikaeta nuitodunitos acamanara kus, luepedorete aingarakin yes arai elomu amaria naka alup. Itunga kwape nat LC1 arai Ejakait loka Etem. Ingarakinete nu itunga tetere mam epedorete aijulanakin aiwadikaeta kwes bonik; naarai ipedorete yesi anyarakin Ejakait loka Etem arai LC1, kanu abunore aitogogong arai ikote awadikaeta nepenen.

Ainakin aiwadikaet kus neejai Ejakait loka Etem, MAM erai ebe, ijai do jo aiwadik alupokon ka Apugan. Mam ebeit jo atacakin icekapun kanuka ngun. Mam da eraun ebe ejaun do loka Etem ka apedor ace mama ejaas alupokon. Konye erai lo erot ediope loipedoria jo aitogogong ebe, naetiakere eikor loka alupok, idaritai arai etupio ikisila luecamanaros itunga kotoma apak naetubere alupok; karaida ejaunos ipegeta ice kanuka alup kangun. Ijo ajaut ka atingit aiwadikaet naka eikor loka alupokon, erai ibore yen ejoko noi, karaida mam jo iyangari aiwadikaet ngin Otem.

Isipedorete bobo aiwadikaeta ka amaapun nu ijo adumun abaluwa (certificate) naitogogongi ebe eraas alupok ngun nukon. Konye arai mam jo ikoto ailipun abaluwa ngin, mam ibuikinio jo. Aiwadikaeta ka amaapu ingarakinete jo kotoma ocaalo kon. Ipedori jo asekun yen iinakini jo aiwadikaeta ngun aingarakin jo aidarit. Emamei yen epedori ayangar aiwadikaeta ngun kanuka apedorosioke, kanu nges aitwasam koiponeke.

## **Akoto eong aitanang ingungeta luka ikoruno luka alup kotoma ocaalo kosi. Eswamata isio nunyoeka kwana? Akiro nutupitono kes nuta:-**

**Akirot na 1:** Itetemik itunga luatutubetekon akiro nu, kojai ateker da nepepe ka Imueban ke. Ekoto ocamanaros itunga kere ebe, eraas akiro nu nuejokuka. Mam ebeit jo aitor okoruno luka atutubet kere adiope paaran. Arai ejaas idunyeta da luekotosi, epedorete kesi da aswam kwangin.

**Akirot na 2:** Otukok itunga luikoruwosi akecemisirin ka nukon. Kocamanaros neitorito ikoruno luka alupokus kere. Arai mam yes ijenete, ingarakisi yes imakio aitacaun.

**Akirot na 3:** Arai ejatatar itunga luipu ka akituk, ekotokin yes acamanar nebeit amaring aitor toma. Ocamanaros igirutu alalauke, kangoli misiri, kotoma omisirin kus iare ngul. Akepolou ebe, ebeit do emisiri loka nginidiope kayesi atuborio, alalau naka akeje nuelasio auni.

**Akirot na 4:** Ocamanaros ekitoi bo ali ebeit yes aitwasam kwape aanyunetekus naka eikorukus. Kotoma aboisio nuipe, ecamunitos itunga luipu airanakin ijumulai. Konye arai ikotosi yesi aseun ibore ice, mam erono oseutu.

**Akirot na 5:** Ipedorete do kwana yesi aipima ikorunokus kere, tetere yes ipedorete aiwadik toma amaapu nainomunete yesi. Arai emamei ibore yen epedori aipima, ojeputu akitoi itwasamata, kanuka adumunia alalau naka eikor kus. Kocamanaros komamei yenengunga bobo.

**Akirot na 6:** Inomutu do amaapu naitodunit imisirin kus kere, toma apapula arai oitabo. Emamei ationis arai mam jo inomuni amaapu nuka imisirin luipu toma apapula adiope; ipedori jo ainomun amaapu naka ngini misiri toma apapulai nuegelegela. Arai ejaas imoru arai icileta luepedorete aingarakin, ipedorete yesi ainomun nguluda. Ekoto aanyun ebe iwadikaete yesi ekiror loka atutubeta ka eitela kangol; nepepe ka etem. Arai ipu ikiroriai luka tutubena nuejaasi elukunitos alupok kus, ekoto aitetemun kes kere kotoma amaapu ka awadikaet.

**Akirot na 7:** Arai iwadikaata yesi ngolimisiri ka enaba ke, ingarakinete nu aitacaun iboro kwape ejatatar. Kosodi do jo aiwadik akiro kere kaileleba toma apapula adiope, ojai anaba loka amisirin toma; tetere nginitunganan epedori ajenun alubo emisiri loinerai kwape iwadikaetere.

**Akirot na 8:** Iwadikaik enaba loka amisirin toma amaapu. Kau naka apapula, arai amaapu. Ipedori jo aiwadik iboro kere luikamunitos amisirin kau naka apapula naejai amaapu toma. Kwape eraar amaapu nakus kere, ipedorete yesi acamanar nuebeit aiwadik apapula. Iwomit isio ebe, ipedorete yesi adumun iboro lu eraas luka ajokis mamakus:-

- Ikiroriai luka ekiliokit ka aberu, ikulepek alupokongun.
- Aojau naka nginimisiri, kwape ipimaitotor yesi.
- Aitejenario naka aboisio, kwape nat, Kide, Angalakimak ka ace da.(nelomunia akolong ka nelomari)
- Arai ejai ace ailet, aitetemun ngunuda kotoma amaapu.

**Akirot na 9:** Ibusakinit idunyeta kere aidokokin akanin kec; aitoduun ebe ecamanara kesi ka eipone lo atiakere alupo ngun. Ejok arai igwaikisi ekiliokit ka akeberu kere akan, tetere eraun aitogogonget ebe emameun bobo angurian kamakec. Arai ejai yenimam epedori aiwadik, idamak ebokoritike loka apolon loka akanike.

**Akirot na 10:** Ekoto ajenak da igwaikisi akecekanin, kanuaitogogong ebe apotu itunga kere ocamanaros.

**Akirot na 11:** Itolom apapulai nuipe nuka amaapu naka alupok. Ekoto koinakinai nginitunganan apapula naitodunit eipone loejaar eikor loka amisirinike ka nuka eidunyetek. Koinakinai aiwadikaeta ngun ace mama ejaas itunga luiwomitos yesi ebe, epedorete araun luka ameda mamakus kotoma acamanar kangin. Ejok ainakin apapulai ace mama ejai LC1 ka ece mama ejai ejakait loka Etem kus. Edol apak naka LC1 kus aiyengun ekoto nges aikopakain aiwadikaeta ngun mama ejai loijauni aswam kamake.

### **Ikotokin kereka bobo isio aijulakin amapu naka alupok kosi?**

Arai egwela idiope kayesi amisirike, ejok aijulakin amaapu ngin bobo. Ekotokin agwelan ka agweleran alosit nejai LC1 ka ejakait loka Etem, kanuka aijulakin ikiroriai kus. Arai egwelaritai atutubet naka amisiri bon, ekotokin yes acamanar kanuka eikor loka alupokokus; eikor iraikinio ejumula kwape kaje; arai bo ikito icie. Ekotokin ngin yes adumun aiwadikaeta nuka atutubet kangin kanaigwelas yesi, kanu atudumikin agweleran ka loagwelan da aiwadikaeteteke.

Ekoto itunga luateker ka LC1 aanyun ebe, mam erutorio ikito loiraikinitai kwape aanyunet naka eikor loka alupok. Itunga luerutonorete ikito lu ekoto aitegel kes, alemun akinei; kosodete atubokin itunga. Ainakin kes airanakin ikito lueipone kangopekangol aboisio nuarutoratar kesi ngul ka aicorakin kes ebe, mam bobo kes ajepanar arai arutonor ikito ngun. Arai iyatakisi kesi aswamungun, eyangario akirokes nejai Apugan (Police) Ekoto akiro ngun iwadikaitos itunga luka ataker ka LC1, kotoma apakio nu eraere ikito ngun oikor.

Arai ikoto jo aingarakinio acie, kotoma oipone loipedoria jo aitanang iceleta luka amariao naka alupok; arai akiro acie kere nuikamunitos apedorosio nuka alupok; odolok

- District Land Board
- Iteso Cultural Union
- Land and Equity Movement in Uganda –  
LEMU P.O Box 164, SOCADIDDO Soroti. Plot 27 Serere Road – Soroti municipality Tel: 0352-280028

Atukot naka LEMU nges iwadikait apapula na kanuka Iteso Cultural Union.  
Kanukangun itijenikinai isio arai idumunit jo akiro nu eraas nuingarakinete. Arai ejaas acie nuiwomit jo ebe ebusakinit aiyatakinio toma, arai ikoto jo aiwadik akirot acie; kodolok isio kotoma:-  
P.O. Box 23722, Kampala.  
Esimu: 0772- 856212  
Email: lemu@utlonline.co.ug